

# JA MYĪMAJTSKPI NØKY MIDI JA PEDRO YJAAY

Ku ja Pedro tnijayi  
pøn tjanchja'widip ja  
nwindsøn'ajtim Jesucristo

**1** Øts idø'on Simón Pedro  
nxøow'ajtpy. Øts ja  
nwindsøn'ajtim Jesucristo  
nmidump jøts øts ja nayide'en  
ngudanaapy. Ixyam meets ja  
nøky ndanigaxi pøn nayide'en tø  
xpaatti ja janchja'win sam øøts ja  
nja', ja'agøjxp ku ja nwindsøn'ajtim  
Jesucristo tyiyi kya'pxyi. <sup>2</sup>Jade'en  
sam x'ejxtit xnijawidit ja Dios  
Teety jøts ja nwindsøn'ajtim Jesús,  
nayide'en idø'on mdaja'adiyidit ja  
y'øy'ajtin kyunuu'kx'ajtin.

Ja' midi yiknigajxø'øgiyip pøn  
tjanchja'widip ja Cristo

<sup>3</sup>Myøk'ajtingøjxp adøm ja Dios  
Teety xmø'øyim køx kida'ak midi  
xka'ejtxa'amp jøts jade'en øy tsuj  
ja ndsinaa'yin nyiknajxint, sam  
ja ajot'ajtin nayide'en yikmo'ot,  
jabí tøxi Cristo xuk'ijxyim  
pøn tø xwi'ijxyim xwigø'øñim  
y'øy'ajtingøjxp myøk'ajtingøjxp.  
<sup>4</sup>Nay yø'øbi køjxp adøm nayide'en  
tø xmø'øyim ja y'øybi, ja  
awejax'ajtin sam idø'on ku tijy

xyiknitso'okwa'añim ya naxwiiñ,  
ma ja tigø'øyin kadye'eyin  
y'ity, jøts jade'en ja kyunuu'kxy  
y'øy'ajtin xukpaajtint. <sup>5</sup>Pøni  
nbaatwa'añimp idø'on ya'at, ja  
janchja'win idø'on nmøøt'ajtimp; ku  
ja wyinaty nmøøt'ajtyimp, winets  
ja tiichinaa'yin ja øchinaa'yin  
n'ixa'ayint; ku ja wyinaty tø  
nbaajtyim xjats idø'on nbadøjka'ant  
sudso ja Dios yja' nnija'wa'ant midi  
tø ttanibiktaagi; <sup>6</sup>kuts ja wyinaty  
nmøøt'ajtna'am, jøts ja yja' jade'en  
nbaduujna'ant jøts adøm ja ngø'øm  
ja' n'ixwejtsint; kuts ja wyinaty  
jade'en tø ndu'uñim xjats idø'on  
ja maa'kxujkin nbadøjka'ant jøts  
nyiktu'unint nixem niyam, jøts  
ja Dios yja' køx kida'ak jade'en  
nnadyamiyojxa'ant; <sup>7</sup>kuts idø'on  
nmøøt'ajtna'ant xjats idø'on ja  
nmigu'uk adøm nixem niyam  
møøt nnamyajya'ant; jøts jade'en  
ja tsojkin nmøøt'ajtint midi  
kamastu'udyim yikja'wip.

<sup>8</sup>Kuts ya'at xyikmøjidit  
xyikyajkidit midi mmøøt'ajttip, ¿ja  
ti nugo meets ndejint tø x'ejxni  
xnija'wiñi ja nwindsøn'ajtim  
Jesucristo? Jabí ka'axi ja  
mdsinaa'yin nugo xyiknaxtit

ya. <sup>9</sup>Pønts ya'atpi winmaa'n̄n tkaba'ayoodip, jade'en idø'on tyimyjaty sam tu'uk ja jaa'y kube'ets kugoots y'etwə'añ kə'ømdsojkingøjxp; ka'ap ja t'ukja'myaajtsni ku ja nwindson'ajtim Jesucristo ja pyojkpi tə tku'oogi jøts ku yam yjapaat'ajtniyi jøts ja chinaa'yin tyiktigajtsnit.

<sup>10</sup>Jade'ents mee migu'uktøjkti, nanky'ejxidi dø'on ku meets ja Dios tə mwi'ijxyidi tə mwigəñidi, jøts jade'en niti nima ja mjanchja'win kyawinguwopidit. <sup>11</sup>Jøts jade'en wyinaty agujk jotkujk mdøjkiñidi ma ja nwindson'ajtim Jesucristo ja kyutujk ja yjaa'y ttanitani, ma ja yiknitsokpi xemikøjxp xyik'ejtint.

<sup>12</sup>Paty meets ya'at ejtp ndukja'myats'ett, øy yø xanija'wiñidi øy yø xjadamøk'ajtnidi Dios tyiy'ajtin midi mmøøt'ajttip. <sup>13</sup>Øy øts idø'on ja njawi ku meets njaakajpxwejt, ku njaakjujky'att, <sup>14</sup>jabi təxi øts ja nwindson'ajtim Jesucristo xuknijawi ku øts tsojk ya'at naxwii'ñit nmajstutnit. <sup>15</sup>Tuki'iyi øts yø n'aaw njoojt nbikta'akt, jøts xja'dyangøxtit yø' kajpxwejin, jøts jade'en ku wyinaty tə nja'oo'kni njadigəñi, ejtp yø xja'myats'ettit.

**Pøn t'ejxtøø wyemp y'amp sa Cristo  
tnanky'ejxøø ja myøj'ajtin**

<sup>16</sup>Øy meets mwə'a'ant ku myikwindaa'y'atti ku meets tə ndukmadøy ja xpxøjkin midi ñigajpxpy ja nwindson'ajtim Jesucristo myøk'ajtin jøts ku ja mye'ent jadigojk. Ka'ap øøts yø kə'øm tə nyik'øyi yø' madya'aky, jabi təxi øøts idø'on kə'øm

ndyimy'ixy ja nwindson'ajtim y'øy'ajtin ja myøj'ajtin. <sup>17</sup>N'ejx øøts ku ja Dios Teety tyikajty jøts ja Cristo ja windsø'jkin winja'win tpaatt, ku ja ñine'kx tyigajch jøts ku amuum chamaambijkyaju'uk agujk. Nmadoow øøts nayide'en ja Dios Teety y'aaw y'ayuujk ku yide'en wyaañ: "Øts ya'at n'U'nk midi kawinmaa'ni ndsojknajpxy, midi øts ixyam øy yikxon ndajotkujk'ajtpy." <sup>18</sup>Kə'ømxi øøts idø'on ndyimyadøøy ja Dios Teety y'ayuujk midi tsajpjøtpy kidaajk, jabi jamxi øøts wyinaty kojpkøjxp midi kunuu'kxy, møøt øøts ja nwindson'ajtim jam wyinaty.

<sup>19</sup>Kidi yø'øyipxi dø'on ja'ayi nugo ejxpajt'ajtp, pø təxi ja Dios Teety ja kyajpxy tpaduñ midi ja kyugajpxy windi'ixyip yjaadyandøø. Øy'ajtp idø'on jade'en ku jade'en xu'unt ku xunk'attit yø'øbi kajpxy, yø'øbi ayuujk, midi ja wejin ja kajin xmø'øyimp jøts ja kugoots'ajtin jade'en xmajtstuujtint. Jade'ents Cristo ja yja' xagujajamp xagudøø'kxamp kunim ja mye'ent jadigojk jøts kə'øm ñanky'ejxiytnim. <sup>20</sup>Ja ku dø'on jawyeen kuwani xnijawidit jøts ku ja Dios kyajpxy ka' nugo øy pøngapøn nugo ajawi tja'gyuki, <sup>21</sup>jabi ka'axi ja Dios kyugajpxy kyø'øm winmaa'n̄n ttakajpxtøø. Dios Teety miyøxy ja'adi, jøts tñigajpxidi ja yja' sa jaty ja Espiritu Santo wyinmaa'n̄nmyøøjyidøø.

**Pøn ñanky'ixpøjkidip ja taay'ajtin**

**2** Nayide'en idø'on Israelit jaa'y y'ejtmidi pøn ñadyijyi nañikajpxidip ja Dios kyugajpxy;

nayide'en meets idø'on winaagin xnitaayibyajtmidit ja Dios yja', pøn idø'on kø'øm t'ejxma'tnidip ja nwindson'ajtim midit tø yiknitsø'gyidi; kø'øm idø'on ja myøj'ayo'on wyinaty tsojk t'ixa'adi.

<sup>2</sup>Namay idø'on jaa'y ja tpabøktit ja y'axøøkpì tsinaa'yin, jøts ja'agøjxpti wenk yiknimadya'akt ja Dios kyajpxy midit yiknitsoojkp. <sup>3</sup>Kuts ja meen ja t'amidit tjotpidit, jade'en meets idø'on mwigaadsidit mwibøkidit, ku o tigati kajpxy mdawindaay'atidit meengyøjpx; ja'atp idø'on ja myøj'ayo'on ja'adi, niti nitsoojkin, jabi jekyipxi dø'on tø yiktanibiktajkiñidi ku jade'en yjattit.

<sup>4</sup>Ka'ap ja Dios tmaa'kxuujky ja y'ankilistøjkti pøn kamimadoojyidi, jagam idø'on ja tñajtswojpiyiiñ mā ayodaajk jap, jøts jap kube'lets kugoots tsumy t'awejxti ja tiidyu'unin. <sup>5</sup>Nika'ap nayide'en ja Dios tmaakxuujkmi ja jaa'y pøn jekyip tsinaamyidøø ku ja Noé yjuky'ajty. Ja kom tuuxi dø'on tyanigajx, jøts jade'en tuki'yiyi ja naxwii'ñit ñijaa'xni ñigomni, jøts jade'en y'o'jkøjxtøø ja ka'øyjaa'dyi. Ja'ayi tyiknitsøøjky ja niwixujkpi jaa'y jøts ja Noé pøn ja tiichinaa'yin tñigajpx. <sup>6</sup>Nayide'en tyikutujkmaa jøts kyudigø'ødyit ja kajp midit txøow'ajtøø Sodoma jøts Gomorra, jade'en tyikudigøøy, nugo jaam tyiktaañ, jøts jade'en t'ejxpajt'attit ja ka'øy jaa'y pøn wyinaty ja chinaa'yin tyiknaxwandipnim. <sup>7</sup>Yiknitsoojk ne'egi ja Lot, pøn y'ijty øyjaa'y'ajtp jøts pøn nayide'en tjanchø'ødyunja'widip ja y'axøøk tsinaa'yindi. <sup>8</sup>Jabom jabom

idø'on ja y'ijty yjotmay'øøky ku t'ixy tñijawi sa ja'abi jaa'y yjanch'adø'øtstøø. <sup>9</sup>Jade'ents idø'on, maajyip idø'on ja nwindson'ajtim jøts ja xpudøjka'ant mā ja yigaappi y'axøøkpì xmimajada'akwa'añim wine'en adøm tø nadyamiyojna'andi ja nwindson'ajtim yja', jøts nayide'en myaa'miyi tyik'ayo'ombaatt øy pøn tundigøøbyidi ku wyinaty ja tiidyu'unin myiñ kyida'aky.

<sup>10</sup>Yik'ayo'ombaattp ja Dios ja'adi dø'on pøn kø'øm ja y'axøøk tsojkin tpadundip jøts pøn tteky'aa'n'ajttip ja nwindson'ajtim kyutujk. Namyikajxidip ja', ap tyimñayjawiyidi; ka' ñadyijyi tyimchø'øgidi jøts tka'ømyigajpxti tka'ødyejti ja kutujk'ajtin midit jap tsajpjøtpy, <sup>11</sup>yam ja ankilistøjkti niti nisa kyawa'andi jam nwindson'ajtim wyingujk, jawaani møkts ja ne'egidi ja kyutujk.

<sup>12</sup>Nayide'en idø'on ja'adi sam ja jiyujkindi, niti ja'gyukin tkamøø'tatti, nugo ja yjuky'ajtin yikjuky'atyidi, ja'ayi t'awejx'atti sa ja myigu'uk tmatstt uk yikmatstt kø'øm, sa ja o'jkin tigø'øyin tpaattit. Tum wimbet ja tmadoojidi ja Dios yja'. Ka'ap ja tjagyapi ja madoogukin; tyimñayide'en idø'on ja y'ooktit sam ja jiyujkti nugo ñaxti, <sup>13</sup>kyu'ayo'ombaadidip sam ja myigu'uk tø tyik'ayo'ombaatti. Jotkujk idø'on ja tjanch'ukjawidi ja y'øybi yjòjkchpi midit pojñ najxp; nugo dø'on ja chø'ødyundi ku meets ja mxøduñ møøt, jøts ñadyijyi yjanch'uknankyotkujk'atyidi jøts meets ja jade'en xpabøkt.

<sup>14</sup>Ka' idø'on ja tø'øxyøjk ja nugo t'ejxtit, ja' idø'on ja

wyinmaa'n'attip jøts tmøøt'attit; ka' idø'on ja pøktyu'unin yjotnaxyidi. Ja win'øø'nik ja'ayi tyunk'ajttip jam ma pøn ja yjanchja'win kyamøjkidinim; tuki'iyi tniwa'anwa'angøjxti ti jaty ja myigu'uk yja'ajttip; ja dø'on møk ayo'on ja Dios ttukpaadidip. <sup>15</sup>Abiktyuu' idø'on tø tpabøknidi ku ja tiidyuu' tø t'ixmatsti. Wa' idø'on ja y'ejxpajtin pyaduujnidip ja Beor myajnk midi Balaam xyøøw, pøn ñadyijyi kyajpxnajx ja Dios yja'. Ya'at jaa'y, o dø'on ja tigati ttunwaañ, jøts jade'en ja meeñjingaap taagyøjxp tpaaty, <sup>16</sup>kunim idø'on ja Dios tu'uk ja jachu' tyikajpxt jøts ja pyøky yiktawindsø'ty jøts jade'en ja kyujuun'ajtin tka'ukyikmajadaknit. <sup>17</sup>Jade'en idø'on ya'at jaa'dyi sam tu'uk ja tø'øts nøømu'ut ni tukxa'kx ja ñøø. Nayide'en ja'adi, sam ja poop yoots midi katuup, nugo pyojwidity; jap idø'on ja kyastigi agoostujpy tø yiktanibiktaajkiñidi. <sup>18</sup>Jabi tum wenxi ja myadya'aky ja'adi, tum ja katumbi kyajpxy'ajttip, jøts ja jaa'y twindaay'atti ku ja y'axøøk winmaa'n' ttukpadundi yam ja wyinaty namnim tø tja'uk'ixmajtsmidi ja'abi tsinaa'yin. <sup>19</sup>Ja tsinaa'yin ja tyaguwa'anidip ma øy sa y'adøtsnidit. Tø ja kø'øm tniymiwanjajtnidi jiyujkin ja axøøkpi tsinaa'yin. Ku pøn nugo tyimyikmajada'aky øy yjade'embj, janch amøñi dø'on ja tpaduñ øy yjawi sa tmijajtni. <sup>20</sup>Jawaani møk idø'on ja ayo'on tpaattit pøn ja nitso'ok'ajtin tø t'ukpaaty nwindson'ajtim Jesucristo

køjxp, jøts jadigojk ja kya'øy'ajtin tpadundøjkigyojmidi. <sup>21</sup>Ne'egi øy jeexyip tpaaty ku jeexyip tkanijawidi ja tiichinaa'yin, jøts jade'en jeexyip tka'uk'ixwejtsni ja Dios kyutujk midi øy midi wa'ats, midi wyinaty tø y'ukyikmo'odi. <sup>22</sup>Jabi tøxi dø'on ja' ayuujk tyiy ku jaa'y y'ukwaañ ku ja uk ja y'iich jadigojk tniwimbity, jøts ku ja kuch midi namdseepnim jits ja jadigojk nay jaayi ja mo'onts tseemujkojmi. Jade'en idø'on yø ndejint yø'øbi jaa'dyi.

### Ku ja nwindson'ajtim mye'ent jadigojk

**3** Meets migu'uktøjkti, ya'at idø'on myimajtsk nøky midi mee ndanija'ayip. Nayide'ents meets ixyam ndanijayi sam jawyeen, jøts ku meets x'ejxkapt ja tiwinyinmaa'n' midi ngajpxpatpy. <sup>2</sup>Jade'en ø nwa'aañ ku meets xja'myatst ja Dios kyugajpxy sa ja y'ayuujk tyikwaañ pøn ja Dios tø ñadyamiyøxyidi, jøts nayide'en xja'myajtsmidit ja nwindson'ajtim kyutujk pøn yiknitsoojk, sam øøts tø nnigajpxy pøn ja kyudanaabyi'ajttip. <sup>3</sup>Jawyeen idø'on tyimbyaat'atyi meets xnijawit ya'at: ku wyinaty myeni kyidakni ja tiidyu'unin, winets idø'on ja jaa'y kyaxøø'oktit midi tyaxe'ektip tuki'iyi ja Dios yja', jøts nugo tniðsøønidit midi axøøk wyinmaa'n'nyøtpty myøøt'ajttip, <sup>4</sup>jøts yide'en wya'andit: "¿Sams idø'on ja Cristo y'ayuujk tø yjajtni kuts idø'on ja tijy wyimbett jadigojk? ¿Windemnimts idø'on ja yjatt? Jabi nitits kyamiñ kyaja'aty,

jade'eñim y'lity sayim ja n'apteety tyiknaxtøø." <sup>5</sup>Kyaja'myajtstip idø'on yø' ku naxwii'ñit kawinaak ojk tø yjadigach, jabi windi'ixyixpi ja tsajp ejtni jøts ja naajx pyidiimñim nøøjtøpy, Dios Teety y'ana'amingøjxp. <sup>6</sup>Kyaja'myajtstip idø'on nayide'en ku ja Dios kawinaak xøøw anaduu' tkejxy, jøts ja naxwii'ñit jaa'y jade'en kyudigøøgyøxtøø. <sup>7</sup>Y'awixy'ajttip idø'on yø', jawaani møj ja ayo'on midi wyinaty memp sam ja kø'øm tø ttanibiktajkiñi ku tnajtskaxit ja jønyow. Ja'abi jøøn idø'on yiktøoyidip ja ka'øyjaa'dyi ku wyinaty ja tiidyu'unin ñaxy.

<sup>8</sup>Mnija'wip meets nayide'en ku ka'ap ja nwindson'ajtim ja xøøw ja jumøjt tmøjpikta'aky, jade'en ja t'ixy ja tu'ukpi xøøw sam ja tukmilbi jumøjt. <sup>9</sup>Kidi meets mwinmay sam winaagin wya'andi ku ja nugo tyaa'ni ku kyamiñ jadigojk sam ja kyajpxy tø tpikta'aky, møk idø'on tyuda'aky'ajtin ja tyikmajada'aky jøts ja jadine'en xmaa'kxuujyim. Ja' chøjkpy jøts ka'ap pøn nugo wyindigø'øty jøts ja ndsinaa'yin nyiktigajtsint.

<sup>10</sup>Jade'en idø'on ja nwindson'ajtim jotkumoni ja tyiidyu'unin tmøøtja'att, jade'en sam maa'tspa'an adsu'jkyi koots myiñ yam niti kyayikjøp'ixy. Kuts ja nwindson'ajtim yja'att jade'en, winets idø'on tsajp pyømemga'akt ku ja kyudigø'øyin tø myeni. Winets tyøøbyøjkøxnidit tuk'ojkyi ja tøø'kxpi tsamambi midi jam tsajpwemp, jøts yø naxwii'ñit tuki'iyi tyigøøñit jønyow agujkpy.

<sup>11</sup>Jabi jade'enxi dø'on ja ayo'on ñaxkida'akt ya naxwiiñ, ijadits adøm idø'on nganadyamiyojxa'ant ja Dios! <sup>12</sup>Yikyijyidi ja mxøow ja mjumøjt jøts ja yja' xyikmayidit, jøts jade'en chojkít ja xøow ja jumøjt ku wyinaty kyudigøøgyixy jønyow agujkpy tuki'iyi midi jam tsajpwemp jøts ya naxwiiñ; <sup>13</sup>ja'ats idø'on adøm n'aweixindip ja jembyi tsajp ja jembyi naajx midi ja Dios tø tni'adsowi kø'øm, ma dø'on niduki'iyi ja jaa'y ja y'øybi ja tyiibyí ttu'undit.

<sup>14</sup>Paty meets migu'uktøjkít, ku ya'at xjøp'ijxy'attit, tum ja' meets mdu'ump midi ja Dios chøjkpy, tsokti ja tuda'aky'ajtin, nixem niyam mnamyayidi jøts jade'en ja Dios mbaadiyidit niti pøky niti kadyeey. <sup>15</sup>Ja'gyukidi ku ja nwindson'ajtim tsojk kyamiñ, paty idø'on ja ttuñ jøts nyikmøja'ant nyikmaya'ant ja nitso'ok'ajtin, ja tyuda'aky'ajtin idø'on ja jade'en yiknigaxi'kpy. Nayide'en meets idø'on tø mdanija'ayimidi yø'øbi winmaa'yin ja Pablo, adøm nmigu'uk, ku tyiktuñ ja ja'gyukin midi ja Dios tø myø'øyi.

<sup>16</sup>Tum ya'atpi ixpøjkin idø'on kyajpx'ijtpy ma ja nøky ja jaa'y ttanijayi, øy idø'on ja muum tsep ku nja'gyukiwya'anint, jaa dø'on ja kaja'gyukibidi, jøts pøn ja yjanchja'win kamøktaktipnim tum wenk idø'on ja ixpøjkin ja tjuutti, ka'ap jade'en ja Pablo yjawa'añ ñøkyjøtpy. Nayide'en idø'on ja ttumidi tuki'iyi ja Dios kyajpxy kyø'ømgudigø'øyingøjxpti.

<sup>17</sup>Paty mee migu'uktøjkít, jabi mnija'wiñidixpi meets ya'at tuki'iyi.

Nay'ejx'etidi jøts ka' xpabøktit sa  
 yø' jaa'y wyā'andi, ku taagyøjxp  
 myikpøjkiwya'andi ja mjanchja'win.  
<sup>18</sup>Ne'egi ja' pawinmaydi sa ja  
 nwindsøn'ajtim Jesucristo ja

tyiy'ajtin xnija'wiyidi. Yikmøjidi  
 ja tsojkin ja pa'ayo'owin midi ja  
 yiknitsokpi tø xmø'øyim, pøn ja  
 y'øy'ajtin myøj'ajtin xemikøjxp ejtp.  
 Jade'ents idø'øn yjatt.